

四庫全書

子部

欽定四庫全書

山堂肆考卷二十六

明 彭大翼 撰

地理

谷

說文泉出流川為谷爾雅水注川曰谿注谿為谷

鳳凰

鳳凰谷在延安府宜君縣西南嘗有五色雀見故名唐

建玉華宮於此

鸚鵡

翰林志唐韋嗣立營別第於驪山鸚鵡谷中宗臨幸命  
從官賦詩製序賜貺優備因封嗣立為逍遙公名所居  
為清虛原幽棲谷

公主

鞏昌府成縣東北有公主谷後魏宣武時為公主湯沐  
邑故名

郎君

六帖王龜字大年侍父至河中結廬於中條山谷中朔望一歸省州人號為郎君谷

清溪

鬼谷先生春秋晉平公時人姓王名詡一作詡嘗入雲氣山採藥得道顏如少童居清溪之鬼谷蘇秦張儀問道三年辭去子曰二子輕喬松之永壽而貴一旦之浮榮惜哉

華亭

松江府崑山西南有華亭谷谷有水縈繞百餘里出鱸魚  
蓴菜

白鴉

白鴉谷在西安府藍田縣東谷口出粟又縣南有青泥  
水故杜詩盤剝白鴉谷口粟飯煮青泥坊底芹

青牛

青牛谷在廬山五老峯下相傳道士洪志乘青牛得道  
於此唐楊衡詩隨雲步入青牛谷青牛道士留我宿即

此

鴛鴦

魏都有鴛鴦谷

雀鼠

雀鼠谷在山西汾州介休縣西南唐玄宗北巡并州嘗  
經此處又以卽將王威高君雅將兵討甄翟兒遇於雀  
鼠谷卽此

黃金

黃金谷在漢中府洋縣東蜀將王平拒曹爽於此

白石

白石谷在太原府清源縣西白石山谷水流出合平泉入汾鳳翔府隴州汧源舊縣界有白環谷以白環水出焉故名

愚公

愚公谷在臨淄縣西北韓非子云齊桓公逐鹿入谷問一老父此何以名愚公谷對曰臣畜牸牛生犢賣犢而

買駒少年謂牛不能生馬遂持駒去傍隣聞之以臣為愚故名

老姑

老姑谷在保定府唐縣葛洪山西南宋時有一老姑嘗謂人曰貧道住此二百年矣言畢投崖下不墜飛昇而去後人名其崖為捨身崖

王官

唐司空圖彙官居中條山王官谷時寇盜所過殘暴獨



不入此谷

盧師

河間府景州東有盧師谷元天歷中旱安陵道士持谷中蛇名小青者至謂禱之即雨脩縣尹呂思誠以其惑人乃殺蛇

子午

子午谷在西安府城南谷中路連南北故名又按長安志王莽有意篡漢通子午道後人因名為子午谷杜詩

故人今居子午谷獨在陰厓結茅屋屋前太古玄都壇  
青石漠漠常風寒玄都壇漢武帝築在子午谷中

褒斜

褒谷在陝西漢中府褒城縣東北出連雲棧直抵斜谷  
郡國志北口曰斜南口曰褒漢張良說高祖燒絕棧道  
曹操出斜谷軍遮要以臨漢中諸葛亮由斜谷取郿皆  
此道也

棲賢

宗少艾卧遊錄宋元豐三年六月過廬山涉山之陽入  
棲賢谷中多大石岌業相倚水行石間其聲如雷又如  
千乘車行者震悼不能自持雖三峽之險不過也

坑儒

坑儒谷在西安府臨潼縣西南漢衛宏云秦既改古文  
為篆隸患天下不從而召諸生至者皆拜為郎又密令  
冬月種瓜於驪山硯谷中溫處瓜已實乃詔諸生往觀  
先為伏機於瓜處諸生方相論難因發機陷之後人號

曰愍儒鄉唐立旌儒廟

豹林

豹林谷在西安府長安縣南山谷中水北流又有竹谷水自南來會子午谷水自東來會竝入交水

鴻池

鴻池谷在涼州昌松縣詳見石類

蒼簞

長沙府嶽麓山下有蒼簞谷乃僊巢先生鍾尚書閑居

遊觀之地上有吹香亭宋理宗親書僊巢吹香亭五字  
有詩放鶴去尋三島路任人來看四時花

簞簞

陝西漢中府洋縣西有簞簞谷谷中多竹宋蘇東坡嘗  
為文同與可作簞簞谷竹記

掛甲

掛甲谷在密雲縣東北舊傳宋楊延朗北征掛甲於此  
彈琴

彈琴谷在四川黎州安撫司城西北水出溪中聲如彈琴

遮馬

遮馬谷在平陽府河津縣北谷有水可分渠溉田

盤龍

盤龍谷在四川黎州漢源鎮東北

康王

康王谷在九江府西南楚康王避難隱此中有水簾泉

唐陸羽茶經品其水為天下第一

馮公

馮公谷在驪山戲水自此谷北流歷戲亭東入于渭

刻木

襄陽府南漳縣南有刻木谷漢孝子丁蘭所居

斷梅

周世宗以荆塗二山有王氣斷之時有梅族居此因名

谷曰斷梅谷在懷遠縣

黍谷

見地理中

柳谷

唐陽城隱居柳谷李泌薦為諫議大夫

鄭玄耕

興元府褒城縣西北有箕谷一名道人谷漢成帝時鄭子真耕於谷口又曰鄭谷

李愿隱



懷慶府濟源縣北有盤谷唐李愿歸隱於此韓退之送  
愿序曰太行之陽有盤谷盤谷之間泉甘而土肥草木  
叢茂居民鮮少友人李愿居之

雲門

西安府澄城縣西北有雲門谷

天井

盤谷西北有天井谷石上有數坎其深若井水自上溢  
相接而落望之若倚劍

竅見天台

臨洮府城西有通谷可容千百人上有大竅可見天台

路通甘州

臨洮府蘭縣西有李麻谷路通甘州

產靈芝

僊芝谷在平陽府永和縣北谷中產靈芝草

生甘菊

荊州記南陽酈縣北其涯多芳菊水甚甘馨名曰甘谷

飲此水者多致壽

雕窠

鞏昌府秦州南麥積山之北有雕窠谷舊有隗囂避暑宮對面有瀑布瀉出蒼崖間亦勝景也

豁都

平陽府鄉寧縣東有豁都谷每大雨西山諸水皆會此谷下建襄陵太平二縣境溉田甚廣

投石鳥飛

車箱谷在西安府華陰縣西南深不可測禱雨者投石其中若有鳥飛出即雨

見劍獸死

黃巢谷在漢中府金州牛山唐末黃巢作亂太白山人謁金州刺史云請掘此谷則賊自敗掘之得一石桶上有一劍中有黃腰獸獸見劍自撲而死後巢果敗

牛口

牛口谷在真定府臨城縣西昔有童謠曰竇入牛口勢

不得久竇建德為唐兵所破走至此果被擒

馬趯

宋李永奇挈家出城至馬趯谷為金人所害即此

崢嶸

青州府莒州焦原山有崢嶸谷此山臨百仞之溪人莫敢近惟莒有一勇士登焉故謂此谷為崢嶸谷

錦繡

撫州府金谿縣後有錦繡谷宋王安石詩還家一笑即

芳辰好與名山作主人邂逅五湖乘興往相邀錦繡谷  
中春

深藏數十家

東柯谷在鞏昌府成縣東南唐杜甫姪佐居此谷其居  
後為寺山下有大樹人呼為子美樹甫詩云傳道東柯  
谷深藏數十家對門藤蓋瓦映竹水穿沙

大破十萬衆

三都谷在鞏昌府秦州境宋曹瑋大破喃廝羅十萬衆

於州之三都谷卽此

村

說文村墅也

石紐

石紐村在城都府汶川縣境帝王世紀所謂禹生石紐  
卽此今名剗兒畔

凌消

凌消村在真定府城東村有危渡相傳漢光武南奔馳

至滹沱河水合遂得渡軍士渡未畢冰復解因名危渡  
其村名凌消

懸水

徐州呂梁洪名懸水村取莊子懸水三十仞之義

斷石

斷石村在休寧縣西舊名吳口村西南有石壁下臨深  
溪相傳昔有兩舟泊此一祭一否夜有神人徙祭者舟  
于北岸有石自絕壁墜碎不祭者舟石墜處遂成石室



禹會

濠州鍾離縣塗山有禹會村

孔靈

孔靈村在歙縣南晉孔愉避地新安讀書於此

梅花

惠州府博羅縣羅浮山飛雲峯之側有梅花村蘇東坡詩羅浮山下梅花村玉雪為骨冰為魂即此

杏花

貴池縣秀山門外有杏花村唐杜牧詩牧童遙指杏花村即此一在徐州古豐縣

白石

杭州艮山門外有白石村宋建隆二年於此建延壽白石寺又德安府東有紫石村村有宰相林即唐許紹墓

赤坎

肇慶府陽江縣朝居里有赤坎村宋張世傑墓在焉

黃葉

宋高宗作詩賜統制劉漢臣勒石潮鳴寺中野水參差  
落漲痕疎林歌倒出霜根扁舟一棹向何處家在江南  
黃葉村寺在杭州慶春門外高宗南渡駐蹕寺中聞江  
濤聲以為金兵追至駭之已而問知其故遂賜寺今名  
黃茅

宋朱文公詩羅浮山下黃茅村蘇儂儂去餘詩魂

金縷

見水

絳帳

絳帳村在鳳翔府扶風縣東南漢馬融教授諸生嘗設絳帳於此

角里

角里村在蘇州洞庭山乃角里先生故居也

伏波

伏波村在扶風縣漢馬伏波將軍故居

昭君

王嬙字昭君生於峽州州有昭君村村中凡生女必灸其面白樂天詩不效往者戒恐貽來者冤至今村女面燒灼成癍痕

莫愁

莫愁村據一統志在湖廣安陸州漢江石城西盧家有女名莫愁善歌唱嘗進入楚宮故後人以其名各村按石城乃晉羊祜鎮荊州時所立非金陵之石頭城也故唐鄭谷詩石城昔為莫愁鄉莫愁魂散石城荒江人依

舊掉舴艋江岸還飛雙鴛鴦帆去帆來風浩渺花開花  
謝春悲涼烟濃草遠望不盡千古漢陽閒夕陽宋王璜  
詩村近莫愁連竹塢人歌楚此下蘋洲觀二詩則莫愁  
村在楚為是或謂村在金陵三山門外又引鄭詩首二  
句為證以附會其說更不究其全文豈以金陵亦有石  
城所誤耶

戚姬

兗州府定陶縣有戚姬村即漢戚夫人生處

馬僊

唐台州人司馬子微隱荆門縣內方山煉丹成僊後人因名其村曰馬僊

獨頭

唐楊妃弘農華陰人後徙居蒲州永樂之獨頭村

由拳

餘杭縣有由拳山傍有由拳村出藤紙搜神記秦始皇東巡望氣者曰五百年後江東有天子氣始皇令囚徒

二十萬人掘汚其地表以惡名故曰由拳

交漳

潞州潞城縣西有交漳村濁漳水與絳水至此交流故名交漳

曲流

曲流村在南寧府武緣縣

五城

五城村在休寧縣古有二十大墳昔人有發之者鐵棺厚



二尺棺纔破便雷雨晦冥人懼乃止

十叢

十叢村在雲南金齒軍民指揮使司城北龍泉出焉

落星

落星村在鳳翔府郿縣五丈原即長星墜諸葛亮營處

朝陽

朝陽本漢之縣名三國廢之其故城在南陽縣朝水之陽故名朝陽今為朝陽村

馬塍

杭州府錢塘門西有東西馬塍村錢王時於此畜馬至三萬餘匹號曰海馬故以名塍此地土細敏樹四時花卉於此出焉元羽士張伯雨結廬馬塍號勾曲外史陳旅為記

魚勒

魚勒村在鳳陽府盱眙縣西村有清眼泉

石壕

杜子美石壕吏詩暮投石壕村有吏夜捉人村在河南  
陝州城東按石壕屬邠州宜保縣即漢鶉觚縣昔北狄  
來侵太王於此築城禦之因名石壕

漆園

大名府東明廢縣有漆園城今名漆園村雲南府經州  
西南有桑園村以桑園河之源出此村故名

景賢

景賢村在懷慶府城東北元許衡別墅在焉

興廉

興廉村在廉州府村有淨行院蘇東坡南遷時嘗宿此  
有詩

董學

河間府景州西南廣川鎮有董家里一名董學村即仲  
舒讀書處朱紹明詩連村禾黍名猶昔故址荒蕪草自  
春慨想江都為相日高風千古更誰倫

黃饒

嚴州府西有黃饒村相傳黃巢將寇郡時有異僧陳尊宿織大草屨置此村木杪賊至視之曰彼有人焉遂出境俗謂黃巢所饒因以名村

### 茱萸

茱萸村在揚州府城東元和志隋仁壽四年開茱萸灣以通漕運因村在其側亦名茱萸村

### 薔薇

揚州府城東北有薔薇溝接高郵永安港耆舊云即昔

之薔薇村也

先主故居

樓桑村在涿州西南即漢先主故居東南隅有桑高五丈許如車蓋人異之因號其里曰樓桑村

方干舊隱

浙江桐廬縣西有白雲村唐方干故居子孫至宋猶盛范仲淹詩風雅先生舊隱存子陵臺下白雲村唐朝三百年冠蓋誰聚詩書到子孫

吳喜好遊

錦沙村在嚴州府淳安縣西傍山依壑素波澄映錦石  
舒文昔有冠軍吳喜聞而造焉鼓枻遊泛彌旬忘返嘆  
曰名山幽谷故不虛賞

胡銓怕入

買愁村在瓊州府臨高縣南宋胡銓詩北往常思聞喜  
縣南來怕入買愁村區區萬里天涯路野草荒煙正斷  
魂

鼠關

白鼠村在邵武府城南相傳昔有白蛇與白鼠相關於此村故名

烏啼

海鹽縣有烏夜村晉穆帝何皇后父準寓此村產后之夕有羣烏驚噪於村落他日復夜啼乃帝立準女為后之日自後有烏夜啼必大赦

一村兩姓



徐州古豐縣深山中民俗淳質一村惟朱陳兩姓世為婚姻因名朱陳村蘇東坡詩何年顧倩丹青手畫作朱陳嫁娶圖聞道一村惟兩姓不將門戶買崔盧

一村二老

蔡脩叢話梧州府博白縣城下有新村吾曳杖其間至一村舍見兩老人坐飲乃兄弟也大者年九十四謂客曰此吾幼弟七十八矣從旁環而侍者皆兩老人之曾孫殆可入畫圖也

西湖村

西湖村在孝感縣西宋太祖微時因渴索酒於村媼家媼持酒以進言權禁甚嚴此私釀幸密之與金不受後太祖登極特寬西湖村酒禁

東湖村

村在孝感縣東宋徽宗時此村有農夫視夜有光燭天聞之於官掘地得周時九鼎貢於朝

莊

莊者取藏聚之義唐人呼別業為莊

晉公散羊

唐裴晉公午橋莊小兒陂茂草盈園公每使驅數羣羊  
散牧其上曰芳草多情賴此粧點按此莊後為宋張魯  
賢所得

和王養魚

杭州府有宋楊和王養魚莊其軒亭有高宗御書按王  
名存中本名沂中字正甫紹興間賜今名代州鄆縣人

從上南渡屢立戰功封和義郡王

珍松怪石

唐李德裕東都有平泉莊周回四十里堂榭百餘間奇  
花異草珍松怪石莫不畢具自作記曰鬻吾平泉者非  
吾子孫也以一石一樹與人者非佳子弟也吾百年後  
為權勢所奪則以先人所命泣而告之此吾志也後經  
世變餘皆不能守俱為洛陽有力者取去記所云者祇  
足貽達人一笑耳初德裕營平泉遠方之人多以異物

奉之有題平泉詩者曰隴右諸侯供語鳥日南太守送  
名花

竹籬茅舍

宋韓侂胄封平原王嘗與衆客飲南園過山莊顧竹籬  
茅舍曰此真田舍間氣象但少犬吠鷄鳴耳俄聞犬吠  
叢薄間視之乃京尹趙師曁也侂胄大笑聞者鄙之  
資福

唐宦官魚朝恩以賜莊作章敬寺以資太后冥福

養貧

宋范仲淹輕財好施尤厚於族人既貴於姑蘇近郭買良田數千畝為義莊以養羣從之貧者擇族人長而賢者一人主其出納

縣西蔡董

二孝莊在汝陽縣西漢孝子蔡順董永所居

城南常杜

常曲在西安府城南樊川為唐常安石別業有林泉花

竹之勝杜曲在城南下杜本杜岐公佑別墅牧又增之  
名樊水園與韋相埒故當時語曰城南韋杜去天尺五

王維輞川

唐王維字摩詰晚得宋之間藍田別墅在輞川中有孟  
城坳華子岡辛夷塢等二十景嘗作輞川圖行於世

東坡湑湖

蘇東坡別業在宜興縣湑湖塘其詩曰買田陽羨吾將  
老從來只為溪山好陽羨即今宜興也秦置陽羨縣

樂天雪莊

白樂天詩明年官滿後擬買雪堆莊

養浩雲莊

山東濟南府城西北有雲莊元中書叅議張養浩休致時所居中有雲錦池雪香林掛月峯待鳳石遂閒堂

韓王莊

韓王莊在淮安府城西北相傳為韓信所生之處

薛球莊



蒲州古城東北有樂安莊宋薛球以樞密直學士致仕  
歸築室以居因其封郡名曰樂安范純仁作記南北分  
為二園其北曰逸老堂公寄傲棲息之所東曰三經堂  
公寄懷於簡編也其西曰無無堂公自以無欲無營又  
取夫莊生之言而名之也

盧田

盧仝莊在懷慶府濟源縣西北石村北之玉川仝詩云  
買得一片田濟源花洞前即此

竇塾

竇氏莊在蘇州城東五代周諫議大夫竇禹鈞故居也  
莊南建義塾四十餘楹聚書數千卷禮文儒延置師席  
凡四方有志於學者聽其自至貧無供需者咸資之

松江別業

唐陸龜蒙嗜茶置園於顧渚山中有別業在松江時往  
來耕種自號天隨子江湖散人

德清別業

元趙孟頫有別業在湖州府德清縣趙有懷德清別業  
詩楊林堂下百株梅傲雪凌寒次第開枝上山禽曉啁  
哢定應喚我早歸來

莊賜鄭光

唐宣宗以雲陽鄠縣莊賜大將軍元舅鄭光大中六年  
詔賜莊免稅役中書門下奏曰稅役之法天下皆同而  
鄭光獨免似乖法意敕曰朕以鄭光元舅初不細思卿  
等苟非愛我豈進嘉言並依所奏

莊賜拜住

保定府新城縣西北有駐蹕莊元英宗嘗駐蹕於此至治間賜丞相蕭拜住為別業俗呼為高密店

文翁莊

文翁莊在舒城縣西南文翁漢舒人嘗讀書於此

子華莊

宋韓子華有石淙莊蘇東坡詩彼美石淙莊每到百事

廢

苑附園

古者苑囿必於東方蓋東方萬物所生之地也天子  
百里公侯八十里伯七十里子男五十里風俗通苑  
蘊也言新蒸所蘊積也說文苑有垣曰囿囿猶有也

黃山

漢書霍雲當朝請數稱病私出多從賓客張園獵於黃  
山苑

白水

陶季直京邦記金陵覆舟山周回二十許有林曰白水苑

甘泉

三輔黃圖甘泉苑在長安城西漢武所置緣山谷行至雲陽三百八十里西入右扶風凡周迴五百四十里苑中起宮殿臺閣百餘所有僊人石闕鸚鵡觀御宿苑

芳林

芳林苑在金陵東北吳時創一名桃花苑齊高帝舊宅

即此

長洲

長洲苑在蘇州太湖北岸吳王闔閭遊獵處

上林

三輔黃圖漢上林苑即秦舊園武帝建元三年開周袤三百里內有離宮七十所皆容千乘萬騎張衡西京賦上林禁苑跨谷彌阜東至鼎湖邪界細柳是也

博望

漢戾太子既冠武帝為築博望苑使通賓客在西安府城北

廣成

廣成苑在南陽府汝州西漢明帝創周圍百餘里後漢靈帝光和中校獵於廣成馬融有廣成頌

樂遊

金陵覆舟山之南有樂遊苑在晉為樂園義熙中盧循反劉裕築樂園壘以拒之即此元嘉中以其地為北苑



更造樓觀於覆舟山後改名樂遊苑

靈昆

東漢靈帝光和二年作畢圭靈昆苑司徒楊賜諫曰先王造園裁足以修三驅之禮薪菜芻牧悉往焉今廢田園驅居人畜禽獸殆非若保赤子之義

思賢

西京雜記漢文帝為太子立思賢苑以招賓客苑中有堂皇六所

宴士

瓊林苑在開封府西鄭門外宋嘗宴進士於此

賞花釣魚

宋太宗雍熙元年召輔臣三司使翰林樞密直學士尚書省四品兩省五品以上三館學士宴於後苑賞花釣魚命羣臣賦詩

解帶移鞍

開封府麗景門外有宜春苑宋人號東御園王安石詩

云宜春舊臺沼日暮一登臨解帶行蒼蘚移鞍坐綠陰  
中立店肆

芳樂苑在金陵臺城內齊東昏侯即閱武堂為之窮奇  
極麗中立店肆潘妃為市令自為市吏錄事將闢者就  
妃罰之百姓歌曰閱武堂種楊柳至尊屠肉潘妃酤酒  
內為海山

隋煬帝大業中築西苑周三百里其內為海周十餘里  
海中為方丈蓬萊諸山出水百餘丈臺殿宮觀羅列山

上海北有龍鱗渠縈紆注海緣渠作十六院每院以四品夫人主之上好以月夜從宮女數千騎遊西苑作清夜遊曲於馬上奏之

桑梓

河內十二境簿洛陽城西有桑梓苑

桂林

左思吳都賦數軍實於桂林之苑享戎旅於落星之樓  
京邦記桂林苑在建康縣北

養鹿

山西遼州和順縣有鹿苑相傳為趙襄子養鹿之所

牧馬

漢舊儀注太僕牧師諸苑三十六所分布西北二邊以  
郎為苑監官奴婢三萬人養馬三十萬匹養鳥獸者通  
名為苑故謂牧馬處為苑

斬豕

唐太宗獵洛陽苑有羣豕突出前及馬銜民部尚書唐

儉投馬搏之上拔劍斬豕顧笑曰天策長史不見上將  
擊賊耶何懼之甚對曰陛下以神武定四方豈復逞雄  
心於一獸上悅為之罷獵

獲兔

東魏永興三年於北苑獲白兔剖之腹中三子盡白

禁山

周禮雍氏禁山為苑令禽獸自得其性

因野

班固東都賦因原野以作苑順流泉而為沼

鹿伏

已下園

詩大雅王在靈囿麀鹿攸伏

麟臻

漢成帝校獵長楊射熊館揚雄作賦以諷之其序曰二  
帝三王宮館臺榭沼池苑囿林麓數澤財足以奉郊廟  
御賓客充庖厨而已不奪百姓膏腴穀土桑柘之地國  
家殷富上下交足故甘露零其庭醴泉流其塘鳳皇巢

其樹黃龍遊其沼麒麟臻其囿神爵棲其林

蕩舟

左僖三年齊侯與蔡姬乘舟於囿蕩公舟注云蕩搖也  
為阱

孟子曰臣聞郊關之內有囿方四十里殺其麋鹿者如  
殺人之罪則是方四十里為阱於國中

棄田

孟子曰堯舜既沒聖人之道衰暴君代作壞宮室以為



汚池民無所安息棄田以為園囿使民不得衣食

取囿

左莊十九年惠王即位取為國之囿以為囿


射鴻

左襄十四年衛獻公戒孫文子甯惠子食皆服而朝日  
旰不召而射鴻於囿

格熊

三輔黃圖漢廣陵王胥有勇力嘗於別囿學格熊遂以

空手搏之莫不絕脰後為獸所傷陷腦而死



山堂肆考卷二十六

欽定四庫全書

子部

山堂肆考卷二十七

詳校官中書<sub>臣</sub>孫 溶

主事<sub>臣</sub>祁韻士履勘

總校官降調繡修<sub>臣</sub> 倉聖脉

校對官主事<sub>臣</sub> 陳 墉

謄錄監生<sub>臣</sub> 黃廷璧

欽定四庫全書

山堂肆考卷二十七

明

彭大翼

撰

地理

園

附圃

說文園植果圃植菜周禮天官園圃以毓草木注云  
植瓜果為園圃其樊也

莊周作吏

史記莊子者蒙人也名周嘗為蒙漆園吏與梁惠王齊

宣王同時其學無所不闕按漆園在鳳陽府定遠縣

仲子辭卿

白帖於陵仲子辭卿相而桔槔灌園按陳仲子字子終齊人也楚王聞其賢遣使聘之欲以為相仲子入告其妻妻曰夫子左琴右書繡織履恬淡無為樂在其中矣結駟連騎所安不過容膝而懷楚國之憂可乎于是謝使者遂相逃而為人灌園

仲舒三年不窺

漢董仲舒下帷發憤三年不窺園

法真歷年不窺

東漢法真隱大澤講藝術歷年不窺園囿

公儀拔葵

白帖公儀休相魯拔園葵不與民爭利

戴宏灌蔬

戴宏為河間相及免歸自灌園蔬以經教授生徒

乘輿入園

晉王獻之高邁不羈嘗經吳郡聞顧辟疆有名園初不相識乘平肩輿徑入辟疆方會客獻之游歷既畢傷若無人辟疆數之曰客傲主人非禮也以貴驕士非道也失是二者不足齒之傖耳便驅出門獻之傲如也不以屑意按辟疆吳郡人歷郡功曹平北叅軍

翻車灌園

魏馬鈞巧思絕世居京師有地為園而無水以灌乃作翻車令兒童轉水灌園



飛蓋相隨

西園在彰德府鄴縣舊治曹操所作曹子建西園公譙  
詩清夜遊西園飛蓋相追隨宋龐籍作飛蓋園以為遊  
樂之所取此義也

持鋤自理

漢孫寶為京尹署侯文為東郡督郵于是灞陵杜桓季  
杜門不通水火持鋤自理園不敢犯法

鋤園得印

東漢桓帝時沛國戴翼鋤園得黃金印

鋤園揮金

世說管寧華歆園中鋤菜見地有片金寧揮鋤與瓦石  
不異華歆捉而擲之人以此定優劣寧字幼安歆字子  
魚

芳林

魏明帝建芳林園在河南府城東北隅齊王芳改為鞏  
林園

香水

北直隸隆慶州有香水園元仁宗誕生處

華林

上元縣治東北臺城內有華林園本吳舊宮苑也世說  
晉簡文帝在華林園謂左右曰會心處不必在遠脩然  
臨水便有濠濮間想覺鳥獸禽魚自來親人

曲水

曲水園在開封府許州城北有大竹二十畝溪水貫其

中以入西湖最為佳處宋文彥博為守時買得之賈昌  
朝來代一日往遊題詩於壁畫船載酒及芳辰丞相園  
林溪水濱虎節麟符拋不得卻將清景付閒人

金谷

金谷園在河南府城西地有金水自太白原南流經此  
谷晉石崇因川阜造園館自作詩序園有清涼臺即崇  
妾綠珠墜樓處

玉津

玉津園在開封府城南宋哲宗時文彥博致仕令有司  
備冊禮餞送于玉津園仁宗時契丹使者耶律防至王  
德用與之較射于玉津園即此及高宗南渡紹興十七  
年又建玉津園于杭州城南龍山之北即史彌遠誅韓  
侂冑處

### 脩竹

脩竹園在開封府歸德州東南梁孝王所置中多植竹  
故云園有白靈山山有落猿巖棲龍岫又有鴈池池有

鶴洲鳧渚即所謂兔園也

瑞夢

瑞夢園在杭州錢王鏐置後捨建龍華寺

逍遙

逍遙園在西安府東山曲唐逍遙公韋嗣立置張說為之記

婆娑

宋崔鷗字德符宣和末除侍御史以攣疾致仕治園數

畝號婆娑園在南陽府郊縣

濯龍

東漢洛陽西北角有濯龍園

鳴鶴

晉宮闕名洛陽宮有瓊圃靈芝園鄴有鳴鶴園葡萄園

桃李

桃李園見春

荔枝

荔枝園在重慶府江津縣廳西北園中荔枝相傳唐人  
所植每熟士大夫相聚食之

納賢

漢主聰為劉后起鸛儀殿廷尉陳元達切諫聰大怒命  
左右曳出之并其妻子梟首于東市時聰在逍遙園李  
中堂大司徒任顗等叩頭出血劉后密敕停刑手疏上  
言妾觀自古敗國喪家未始不由婦人心常疾之不意  
今日身自為之使後世視妾猶妾之視昔人也願賜死



此堂聰覽之變色命顗等冠履就坐引元達上以表示之曰外輔如公內輔如后朕復何憂更命園曰納賢堂曰愧賢謂元達曰卿當畏朕而反使朕畏卿耶

### 宴士

杏園在西安府城東曲江池唐宴進士于此

### 梧桐

梧桐園在蘇州吳宮內夫差所葺樂府云梧桐秋吳王  
愁

苜蓿

郭仲產仇池記城東有苜蓿園

流星

亳州東天靜宮碑有星突流于園老子因而誕生故名

聚景

聚景園在杭州府治西宋高似詩翠華不向苑中來可  
是年年惜露臺水際春風寒漠漠官梅却作野梅開

叢春

洛陽有叢春園宋侍郎安公別業叢春亭出荼蘼架上  
北可望洛水

富春

富春園在河南府城東唐元稹白居易俱有詩又杭州  
有半春小隱等園皆史彌遠別墅

離垢

劉慧斐張孝秀隱居東林寺慧斐于山北構一園名離  
垢時人稱為離垢先生

歸仁

洛陽有歸仁園在舊歸仁坊廣輪皆一里餘北有牡丹芍藥千株中有竹百畝南有桃李彌望唐牛僧孺置至宋時為侍郎李昉所有構亭其中

東籬

梁何點世信佛居東籬園孔德璋為築室豫章王嶷命駕造點點從後門遁去園有卞忠貞塚點植花塚側每舉酒必酹之按此園在應天府東籬門外忠貞晉卞壺

謚

北村

宋戶部尚書吳興沈公為園於城東奉勝門外之北村  
名其園曰自足葉水心為之記

田千秋園

千秋園在河南靈寶縣今舊田村是也宋范鎮詩自古  
桃林漢相園至今有舍號田村蒼山綠水依然在不獨  
青編事業存

白樂天園

李文叔洛陽名園記大字寺園唐白樂天園也樂天嘗云吾有第在履道坊五畝之宅十畝之園有水一池有竹千竿即此

崔端公園

唐李端題崔端公南園詩上士愛清輝開門向翠微抱琴看鶴去枕石待雲歸野坐苔生席高眠竹挂衣舊山東望遠惆悵暮花飛

劉廊王園

秀野園在杭州葛嶺上劉廊王綺別墅中有四并堂

羅隱南園

唐羅隱南園詩搏擊路終迷南園且灌畦敢言逃俗態  
自是樂幽棲

薛能南園

唐薛能南園詩天子優賢是有唐鑑湖恩賜賀知章他  
年我若成功去乞取南園作醉鄉

茂貞園

唐李茂貞園在鳳翔府北城之東宋蘇軾詩我時來周  
覽問此誰所築云昔李將軍負險乘哀叔此園破千家  
鬱鬱城之麓將軍竟何事蟣蝨生刀韉何嘗載美酒來  
此駐車轂空使後世人聞名頭猶縮我今官正閒屢至  
因休沐人生營居止竟謂何人卜何當辦一身永與清  
景遂

朱勔園



宋劉子翬題朱勔園詩樓船載花石里巷無袴襦至今  
江左地風雲亦嗟吁叨榮已過量受禍如償逋荒涼戟  
門路尚想冠蓋趨客船維岼柳鄰人冒池魚徘徊極幽  
觀曲折迷歸途夜月扃綺戶春風散羅裾繁華能幾何  
喪亂實感予曹鄴子何譏此曹真人奴

奉誠園

唐馬燧之子暢以第中大杏餉實文場文場以進德宗  
德宗未嘗見怪問之令中使封暢杏樹暢懼因進宅為

奉誠園一作鳳城

擇勝園

擇勝園在杭州九曲城下宋秀王別墅理宗書擇勝愛  
閣二扁

園侔禁省

洛陽有宋趙韓王宅初詔將作匠營治故其經畫制度  
殆侔禁省韓王以太師歸是第百日而薨子孫皆居京  
師罕居之故園池常扃鑰不啟高亭大榭花木淵藪歲

時獨廝養擁篲負畚鍤者得出入其間而已

園等臺城

齊文惠太子性奢侈開拓園圃與臺城北塹等樓觀塔  
宇多聚奇石妙極山水慮帝望見傍列脩竹內施高障  
仍造遊檣數百間

集芳

集芳園在杭州葛嶺上宋張婉儀別墅紹興間改屬官  
家

樂遊

樂遊園漢宣帝所立唐長安中太平公主置亭遊賞其地每上已重陽士女遊戲被襖登高車馬填塞詞人賦詩傳於京師故杜少陵有樂遊園歌

帝城勝景

景龍文館記芙蓉園在京羅城東南隅青林重複綠水瀾漫蓋帝城勝景也駕時幸之

雲間洞天

雲間洞天宋錢良臣園也在松江府東南良臣叅大政  
多訪江南奇花異卉古松怪石以營之美景佳致有如  
洞天

張漢陽園

唐常臯遷山南節度使張柬之有園在襄陽臯嘗宴集  
將市取之馬彞曰漢陽有中興功今遺業當百世共保  
奈何使其子孫鬻乎臯謝曰主吏失辭以為君羞微君  
安得聞此言

韓平原園

勝景園在杭州西湖雷塘塔路口宋高宗時別館也光宗時慈福太后以賜平原王韓侂冑改名南園陸務觀記其地實武林之東麓而西湖之水匯其下湖山之美天造地設公既受命乃以祿賜之餘葺為南園因其自然輔以雅趣

富鄭公園

洛陽名園多因隋唐之舊獨富鄭公園無所因襲景物

寂勝遊此園者自其第東出採春亭四景堂則一園勝  
槩可顧覽而得鄭公還政歸第謝絕賓客燕息此園幾  
二十年亭臺花木皆出其目營心匠故逶迤衡直闔爽  
深密皆曲有奧思

### 文潞公園

宋文潞公園地薄東城水渺瀰甚廣汎舟遊者如在江  
湖間也淵映瀼水二堂宛在水中湘膚藥圃二堂間列  
水右潞公年九十官太師尚時杖屨遊之

呂文穆園

洛陽有呂文穆園蓋伊洛二水自東南分注河南城中而伊水尤清徹園亭中喜得之文穆園在伊水上流木茂而竹盛春夏又無枯涸之患

韓忠獻園

彰德府相州有康樂園宋韓魏公琦置魏公謚忠獻

楊誠齋園

宋楊誠齋東園新開九徑將江梅海棠桃李橘杏紅梅



碧桃芙蓉九種花木各植一徑命曰三三徑詩云三徑  
初開是蔣卿再開三徑是淵明誠齋奄有三三徑一徑  
花開一徑行

### 施昌言園

真州東有東園宋皇祐中施昌言為發運使得州之監  
軍廢營以作此園歐陽脩記蔡君謨書嘗謂人曰吾用  
顏筆作楮體故其字適媚異常後人因名園記為三絕  
園有澄虛閣清燕堂共樂堂拂雲臺

煙雲掩映

洛陽水北胡氏二園相詎十許步在印山之麓瀍水經其旁因岸穿二土竇深百餘尺堅如埏埴開軒窓以臨水上水清淺則鳴漱湍瀑則奔駛皆可喜也且林木蒼蔚煙雲掩映高樓曲榭時隱時見即使畫工極思不可為圖

景物蒼老

宋節度使苗侯既貴欲極天下佳處卜居因得河南而

河南最佳處又得開寶宰相王溥園園既古景物蒼老  
復得完力以藻飾之於是遂有憑陵諸園之意矣

京北梨園

梨園有二一在雲陽府慶縣漢武置一在京北府通化  
門外唐開元初更置左右教坊以教俗樂又選樂工宮  
女自教之謂曰皇帝梨園子弟文宗時命太常卿王涯  
取開元雅樂按之既成獻於梨園

秦淮菜園

宋書柳元景為尚書令不營產業秦淮南菜園數十畝  
守園人賣菜得錢三萬送宅元景曰我立此園種菜以  
供家中啖耳乃復賣以取錢奪百姓利耶以錢乞守園  
者

葛僊社山園

葛僊園在肇慶府德慶州東社山絕頂相傳為葛洪煉  
丹所今產躑躅花

堯夫洛下園

宋邵堯夫洛下園池詩洛下園池不閉門洞天休用別  
尋春縱遊只卻輸閒客遍入何嘗問主人更小亭欄花  
自好儘荒臺榭景纔真虛名誤了無涯事未必虛名總  
到身

### 獨樂園

獨樂園在河南府城南司馬溫公陝人也判西京留司  
御史臺遂家於洛買宅尊賢坊為園其中命曰獨樂園  
自為之記蘇東坡有詩青山在屋上流水在屋下中有

五畝園花竹秀而野花香襲杖屨竹色侵醖尊酒樂  
餘香碁局消長夏洛陽古多士風俗復爾雅先生卧不  
出冠蓋傾朝野雖云與衆樂中有獨樂者才全德不形  
所貴知我寡先生獨何事四海望陶冶兒童誦君實走  
卒知司馬持此欲安歸造物不我捨

同樂園

同樂園在開封府城東北宋徽宗置又衆樂園在溫州  
府城內縱橫一里中有大池堂榭棋布花木彙列每歲

二月開園設酺人大和會盡春而罷因名衆樂園

玄圃 己下圃

玄圃在崑崙山天帝所居玄一作懸

原圃

左傳鄭之有原圃猶秦之有具圃也

芝圃

廣異記僊都有芝圃悉種靈芝

蕙圃

拾遺記崑崙山第九層有芝田蕙圃

抱甕灌圃

莊子曰子貢過漢陰見一丈人方將為圃畦鑿隧而入井抱甕而出灌搨搨然用力甚多而見功寡子貢曰有械於此一日灌百畦其名曰桔槔用力甚寡而見功多夫子不欲乎為圃者忿然作色曰有機械者必有機事有機事者必有機心機心存於胸中則純白不備純白不備則神生不定神生不定者道之所不載也吾非不



知羞而不為也子貢瞞然慙俯而不對

儵舍為圃

宋張文潛種圃詩儵舍亦為圃從人笑我癡自求佳草木仍插小藩籬吾事正如此人生聊自怡霜松未及尺獨我見奇姿

折柳以樊

詩齊風折柳樊圃狂夫瞿瞿

取瓜以獻

唐主四月憶瓜明崇儼有道術遂索百錢以往須臾以瓜獻曰得之緱氏老人圃中帝召老人問焉對曰埋一瓜失之土中得百錢

列子居

列禦寇居鄭圃四十年人無識者

樊遲學

論語樊遲請學圃子曰吾不如老圃

市

易繫辭日中為市致天下之民聚天下之貨交易而退各得其所風俗通市者恃也言交易而退恃以不匱也古今注闔者市之垣閭者市之門

### 晏宅近市

左昭三年初齊景公欲更晏子之宅曰子之宅湫隘囂塵不可以居請更諸爽塏者辭曰君之先臣容焉臣不足以嗣之于臣侈矣且小人近市朝夕得所求小人之利也敢煩里旅

鄭門如市

漢鄭崇曰臣門如市臣心如水

吳市吹簫

史記伍子胥出昭關夜行晝伏至于陵水無以糊口吹簫乞食于吳市

燕市擊筑

史記荆軻者其先齊人徙于衛衛人謂之慶卿之燕燕人謂之荆卿荆卿嗜酒日與燕之狗屠及善擊筑者高

漸離飲于燕市酒酣漸離擊筑荆軻和而歌于市中相樂也已而相泣旁若無人者荆軻雖游于酒人乎然其為人深沈好書其所游諸侯盡與其賢豪長者相結按筑似琴有絃用竹擊之取以為名

### 宜僚隱居

楚國先賢傳熊宜僚隱居市南不屈于時

### 豫讓行乞

晉豫讓漆身為癩吞炭為啞行乞于市欲殺襄子為智

伯報讐

鶴舞

吳越春秋吳王闔閭與夫人及女食蒸魚王嘗以半與女女怨曰王食我殘魚辱我甚矣乃自殺王痛之葬于郊西昌門外金鼎玉杯銀樽珠襦之寶皆以送女舞白鶴於吳市今萬人隨觀遂使與鶴俱入墓門因塞之以送死

狼入

劉向洪範傳秦惠王四年狼入咸陽市

暴書咸陽

史記呂不韋為相招術士使人著所聞為呂氏春秋暴之咸陽市懸千金其上有能增一字者與千金時無能者

閱書洛陽

東漢書王充字仲子會稽人家貧常遊洛陽市肆間閱所賣書一見輒能誦憶遂博通衆經

辱身為屠

史記聶政軼人殺人避仇與母姊如齊以屠為事濮陽嚴仲子辟人因為政言曰臣有仇而行游諸侯衆矣然至齊竊聞足下義甚高故進百金為夫人麤糲之費得以交足下之驩聶政曰臣所以降志辱身居市井者徒幸以養老母老母在政未敢以身許人也

變名為卒

王莽亂政梅福一朝棄妻子去九江後人有見福于會



稽者變姓名為吳市門卒

賣卜成都

漢書嚴遵字君平賣卜于成都市每依卦教人以忠孝  
揚雄少從之學

滌器臨邛

史記司馬相如者蜀郡成都人字長卿少好讀書學擊  
劍故其親名之曰犬子既學慕蔭相如之為人更名相  
如以質為郎事孝景帝相如素與臨邛令王吉相善嘗

之臨邛臨邛富人卓王孫曰今有貴客為具召之并召  
令酒酣臨邛令前奏琴曰竊聞長卿好之願以自娛相  
如辭謝為鼓一再行是時卓王孫有女文君新寡好音  
故相如繆與令相重而以琴心挑之文君夜奔相如相  
如乃與馳歸成都家居徒四壁立王孫大怒曰女至不  
材我不忍殺不分一錢也文君久之不樂曰長卿第俱  
如臨邛從昆弟假貸猶足為生何至自苦如此相如與  
俱至臨邛盡賣其車騎買一酒舍酤酒令文君當釭相

如身自着犢鼻褌與保庸雜作滌器于市中卓王孫聞而恥之為杜門不出昆弟諸公更謂王孫曰文君已失身於長卿長卿雖貧其人材足依也且又令客獨奈何相辱如此王孫不得已分予文君僮百人錢百萬及嫁時衣被財物文君乃與相如歸成都買田宅為富人

賣膠邯鄲

高士傳毛公薛公遭戰國之亂俱以處士隱邯鄲市毛公為博徒薛公賣膠薛公即孟嘗君田文也

賣藥長安

東漢韓康字伯休京兆灊陵人採藥名山賣于長安市時有女子從康買藥康守價不移女子怒曰公是韓伯休耶乃不貳價康曰我本欲逃名今女子皆知何用藥為乃遁入灊陵山中

翁歸為吏

漢大將軍霍光秉政諸霍在平陽其奴客持刀入市聞變吏不能禁及尹翁歸為市吏莫敢犯者公廉不受饋

百賈畏之

祭遵為令

東漢光武以祭遵為市令上家人犯法遵格殺之

槐市

三輔黃圖元始四年起明堂辟雍長安城南北為會市  
但列槐樹數百行為隊無墻屋諸生朔望會此市各持  
其郡所出貨物及經書傳記笙磬器物相與買賣雍容  
揖遜議論槐下謂之槐市

花市

揚州人無貴賤皆喜戴花每花時開明橋之間拂旦有  
花市焉

引車入市

史記魏信陵君聞隱士侯嬴車騎虛左自迎之侯生曰  
臣有客在市屠中願枉車騎過之公子引車入市見其  
客朱亥

乘駟入市

唐杜佑字君卿為司徒嘗言致仕之後必買小馬跨之  
著麁布襴衫入市看盤鈴傀儡足矣

戎狄互市

唐高祖武德八年突厥吐谷渾各請互市詔皆許之先  
是中國喪亂民乏耕牛至是資于戎狄雜畜被野

官官主市

唐德宗時命官者主官市大率物價直千不償一

獄市

漢齊相曹參入相屬後相以齊獄市為寄慎勿擾也

官市

蠶市在眉州城內官市蜀本蠶叢之國故州民習俗重蠶事每二月望相聚鬻蠶器于此因而縱觀至暮而散  
二蘇有記

夜市

桓譚新論扶風邠亭本太王所居有夜市古詞鐵馬牙旗穿夜市



朝市

周禮地官司市大市日昃而市百族為主朝市朝時而市商賈為主夕市夕時而市販夫販婦為主

虛市

南越謂野市曰虛吳賢良云市之所在有人則滿無人則虛嶺南村市滿時少虛時多故謂之虛市柳子厚峒氓詩青箬裹鹽歸洞客綠荷包飯趁虛人又童區寄傳逾四十里之虛所賣之

亥市

荆吳之俗取寅申巳亥日集於市故謂之亥市青箱雜記蜀有疫市間日一集如瘧疾間日作也江南惡此疾故止曰亥市

橋梁

橋水梁也獨木橋為樅亦曰杓楚人謂橋為圮舟梁謂浮橋秦昭王四十九年始作河橋

玉河

玉河橋在順天府南玉河之上凡三一跨長安東街一跨文德坊一近城垣

金梁

金梁橋在開封府汴蔡故道上

朱雀

吳有朱雀橋晉王敦反改為乘雀橋又名朱雀航今名鎮淮橋又名重譯橋在金陵聚寶門外烏衣巷口

白鶴

白鶴橋在句容縣東相傳大茅君每歲十二月駕白鶴來此會羣僊故名眉州青神縣有青羊橋相傳周時老子乘青羊出關過此橋故名

與女子期

莊子曰尾生與女子期于梁下女子不來水至不去抱梁柱而死

與老父期

史記張良步遊下邳圯上有一老父至良所墮其履圯

下顧謂良曰孺子下取履良愕然為其老強忍下取履  
父曰履我良長跪履之父以足受笑而去復還曰孺子  
可教矣後五日平明與我會此良跪曰諾五日平明良  
往父已先在怒曰與老人期後何也去曰後五日早會  
五日鷄鳴良往父又先在復怒曰後何也去曰後五日  
復早來五日良夜未半往有頃父亦來喜曰當如是出  
一編書曰讀此則為王者師後十年興十三年孺子見  
我濟北穀城山下黃石即我矣按下邳縣有沂水號長

利池池上有橋即黃石公授書之地

相如題柱

漢司馬相如往京師過蜀郡昇僊橋題其柱曰大丈夫  
不乘駟馬車不復過此橋橋在成都府城北

德幹止車

唐權萬紀族孫懷恩嘗過汴州刺史楊德幹與懷恩名  
相埒時汴橋新成德幹立木中涂止過車者懷恩適過  
之示德幹曰民不可止耶焉用此德幹慙服

充國過師

漢趙充國治湟陝以西道橋七十所令可至鮮水左右以制西域伸威千里如枕席上過師

廣德諫帝

漢元帝初元中酺祭宗廟出便門欲御樓船薛廣德當乘輿車免冠頓首曰宜從橋

南鄉

建寧府建安縣東有南鄉橋宋袁樞未第時過此題于

柱曰玉龍倒影卧寒潭人在雲霄天地寬借問何人題  
此柱茂陵詞客到長安

西善

金陵城西南清溪上有西善橋梁時名新林橋武帝敗  
齊師處即此

富平津橋

晉杜預以益津渡險請建河橋于富平津衆論以為殷  
周所都經聖賢而不作者必不可作故也預曰昔造舟



為梁則河橋之謂也固請為之及橋成晉主從百僚臨會舉杯屬預曰非卿此橋不立預曰非陛下之明臣亦無所用其力

逍遙津橋

逍遙津橋在廬州府城東北明遠臺東吳孫權為魏將張遼所襲乘駿馬上津橋橋輒丈餘超渡得免後人名為飛騎橋

駱駝

駱駝橋在湖州府治東以形似駱駝故名舊有顏真卿所書駱駝橋三字

鳳凰

鳳凰橋在松江府城西北跨顧會浦西接鳳凰山尾故名

伍相

伍相橋在衡州府耒陽縣治北相傳吳相伍子胥經此

丁師

丁師橋在武昌府咸寧縣西昔有姓丁者創此橋因名  
吹簫

揚州二十四橋在府城內並以城門坊市為名隋時置  
唐杜牧寄揚州韓綽判官詩二十四橋明月夜玉人何  
處教吹簫後人因名為吹簫橋

裝駕

杭州清泰門西有春熙橋一名裝駕橋相傳宋高宗自  
越州渡以還臨安泊舟裝駕于此

滌羊

杭州湧金門外有滌羊橋宋時滌羊之所也

渡蟻

渡蟻橋在德安府應山縣治南宋郊兄弟嘗隨父官應山後人因郊渡蟻事而遂以名其橋

落驢

袁州府城東有湛郎橋唐貞觀初宜春人彭伉登第其妻與郡吏湛賁之妻姊妹也妻族賀伉坐上皆名士獨

飯賁于後閣賁憤怒自是力學一舉擢上第伉方過此  
橋聞之失聲墜驢故袁人謔曰湛郎及第彭伉落驢又  
名落驢橋

走馬

金陵湘宮寺前有菰首橋一名走馬橋

周處斬蛟

義興郡長橋後漢袁府君造橋下有蒼蛟每吞瞰人周  
處執劒橋側伺其出懸劒自上投下刺蛟背而死按義

興今改為宜興縣

邵雍聞鵲

天津橋在河南府西南架洛水上隋煬帝建用大船連以鐵鎖南北夾起四樓唐貞觀中始甃石為岸即宋邵雍聞杜鵑聲處元順帝至平十八年大都有杜鵑綱目書法宋將亂鵲聲聞于天津今胡運將衰鵲至大都然則國之興亡謂非其數可乎

題扇橋

紹興府戒珠寺前有題扇橋即王羲之題扇處

夢筆橋

山陰縣治東北有夢筆橋相傳梁江淹所居處

三峽

三峽橋在廬山歸宗寺為廬山雄觀蘇轍記水行石間  
聲如雷霆雖三峽之險莫過于此故名

萬里

萬里橋在蜀浣花溪之東昔孔明送吳使者至此曰萬

里之行從此始矣因得名唐玄宗狩蜀過此橋問橋名左右對以萬里上嘆曰開元末僧一行謂更二十年國有難朕當遠遊至萬里外此是也遂駐蹕成都

繫龍

東漢時邑人瞿宗武入峨眉山得道乘龍還家繫龍于潭故潭名繫龍後乘龍而去潭上有橋亦名繫龍宋龐籍送石楊休還峨眉山詩巢鳳閣邊勞遠夢繫龍橋下認前題



乘鯉

乘鯉橋在蘇州子城西北宋吳子英嘗于此得赤鯉有  
趙角遂乘之飛去故名

中渭

中渭橋在西安府西北本名橫橋架渭水上秦始皇併  
天下都咸陽作離宮于渭之南北渭水貫都以象天漢  
橫橋南渡以法牽牛又東渭橋在府城東北漢高祖造  
以通櫟陽之道西渭橋在舊長安城西漢武帝造以通

茂陵以其對便門亦名便橋唐改名咸陽橋

半蘇

半蘇橋在吉安府城南城隍岡蘇軾過此見花木秀發  
以其境半于蘇州故名橋曰半蘇

張塔

張塔橋在松江府城東門外又名衆安橋

盧溝

盧溝橋在順天府西南三十五里跨盧溝河金明昌初

建長二百餘步石欄刻為獅形每早波光曉月上下蕩漾為京師八景之一

機橋殲賊

唐康承訓屯海州度賊將至乃作機橋維以長絙及賊未半渡而絙絕士多溺死其已渡者不得戰遂殲之

航橋控賊

唐史思明自魏至王師南潰郭子儀以朔方軍保河陽斷航橋以控賊

獺嗥

周處風土記陽羨縣前有大橋橋下有獺將有兵動獺  
出穴口向西而嗥

龍卧

朝野僉載趙州石橋望之如初月出雲長虹飲澗天后  
時匈奴默啜欲南渡至橋上忽馬不進見青龍卧此橋  
乃去

子午

唐狄仁傑盧氏堂姨居于午橋南別墅

丁卯

丁卯橋在鎮江府城南晉元帝子裒鎮廣陵運糧出京  
口因水涸奉請立埭用丁卯日後人建橋遂名丁卯唐  
許渾嘗築別墅于橋側宋陸游詩裴相功名冠四朝許  
渾身世老漁樵若論風月江山主丁卯橋應勝午橋

忠孝橋

都昌縣北有忠孝橋跨忠孝港宋寺丞陳畦獲罪其子

代父死故名其橋以旌之

安平橋

安平橋在晉江縣西南石井鎮宋紹興中趙令建長八百餘丈

梯雲

梯雲橋在平湖縣治西

飛虹

譚苑徐常侍鉉仕江南日嘗直澄心堂每入直至飛虹

橋馬輒不進裂鞍斷轡箠之流血掣韁卻立莫知所謂  
餘杭僧替寧云下必有海馬骨水火俱不能毀惟漚以  
腐骨即毀鉉于是得巨獸骨積薪不能焚如法治之怪  
亦隨滅

芙蓉

芙蓉橋在濟南府大明湖上宋曾鞏詩鴈起橫連杜若  
洲碧欄干影在中流蓬萊日月遊人到誰道僊風解引  
舟

海棠

海棠橋在南寧府橫州橋南北皆植海棠有書生祝姓者家此宋秦觀嘗醉宿其家明日題一詞喚起一聲人  
悄衾冷夢寒窓曉瘴雨過海棠開春色又添多少社酒  
釀成微笑半破柳瓢共酌覺傾倒急投牀醉鄉廣大人  
間小

償粟治橋

唐王周歷四鎮皆有惠政定州橋壞覆民租車周曰橋



梁不修刺史之過也乃償民粟為治其橋

據水斷橋

蜀先主為曹操所追張飛據水斷橋無敢涉者

銷魂

長安東灞陵有橋漢時送行者多至此折柳送別唐開元遺事迎新送故皆至此黯然故又呼為銷魂橋

欽化

宋志欽化橋即宣橋也今名太平橋在應天府西北

乘月作詞

綠楊橋在黃州府蘄水縣東蘇軾嘗夜醉乘月卧此橋  
既覺作西江月詞其末句解鞍歌枕綠楊橋柱宇數聲

春曉

望江製賦

台州府臨海縣有赤欄橋晉成公綏為章安令登橋望  
江製雪賦

大夫橋

唐隱士張志和築室越州東郭觀察使陳少游往見為  
終日留先是門阻流水無橋梁少游為創之人號大夫  
橋

太師橋

太師橋在同安縣治東宋建隆初留從效造張贊明記  
積師得陸羽

沔陽州景陵縣有鴈橋舊傳有人見鴈集西陂覆一小  
兒于下僧史積師得之育三歲不知其姓以易筮之得

蹇之漸父辭云鴻漸于陸其羽可用為儀乃氏以陸名以羽字以鴻漸後人因以鴈名其橋

似道遇葉李

宋帝熈德祐中詔責授宰相賈似道高州團練使至洛陽橋遇葉李李乃似道為相時所摘貶者自漳州召還見于客邸因作一詞贈似道曰余歸路君來路天理昭昭胡不悟公田闢會更何如子細思量真自悟雷州戶厓州戶人生會有相逢處客中邂逅欠蒸羊聊贈一篇

長短賦按洛陽橋在泉州晉江縣東萬安渡以其跨洛陽江故名一名萬安橋宋郡守蔡襄君謨建自為記云萬安渡石橋始造于皇祐五年四月庚寅以嘉祐四年二月辛未訖功累址于淵醺水為四十七道長三千六百丈廣百有五尺翼以扶欄如其長之數而兩之糜金一千四百萬職其事者盧錫王實許忠浮屠義波宗善等十有五人既成太守莆陽蔡襄為之樂合燕飲而落之明年秋蒙召還京師道由是出因記所作勒于岸左

又按江在泉州而名洛陽者唐宣宗嘗微行覽山川勝  
槩至泉州江上有類吾洛陽之語故名葉李臨安府學  
生理宗景定四年貶漳州

雙投

杭州西湖南入路有雙投橋相傳舊有情人雙投于橋  
下故名一名長橋元富春馮士頤詩云與郎情重得郎  
客南北相看只兩峯請看雙投橋下月新開雙朵玉芙蓉

七縱

七縱橋在四川雅州孟山下相傳為孔明擒孟獲而得名

六橋

杭州西湖蘇隄其橋有六曰映波鎖瀾望山壓隄東浦跨虹是也自淨慈寺前直抵大佛頭即所謂蘇隄也

七橋

常璩華陽國志李冰造七橋上應七星

竹橋

竹橋在應天府西安門外之北跨清溪上

楓橋

楓橋在蘇州城西面山臨水可以遊息南北往來必經于此唐張繼有楓橋夜泊詩即月落烏啼霜滿天四絕句也

虎渡

虎渡橋在漳州府城東柳營江上昔有虎渡是江土人



因以名橋古諺虎渡通人行漸漸出公卿此橋宋嘉定間建

鶴舞

鶴舞橋在蘇州城東北隅相傳吳王女出葵日有鶴舞

于市故名

五柳

五柳橋在嘉興縣治西一名豐慶橋宋張堯同有詩

百花

百花橋在南昌府東湖北百花洲上宋況志寧詩波光  
清淺玉虹橫過客誰題柱上名錦繡鋪張春色滿小車  
花下麗人行

吳江長橋

長橋在蘇州府吳江縣東門外有七十二洞舊名垂虹  
橋東西千餘尺橫跨松江前臨大湖乃吳江絕景也宋  
鄭毅夫詩三百欄杆鎖畫橋行人波上踏瓊瑤插天蟬  
螭玉腰濶跨海鯨鯢金背高

惠州浮橋


羅浮逸士鄧守安于惠州東始作浮橋隨水漲落

去思橋

福州府城有去思橋舊名澳橋宋守謝泌重建後人因名

歸去橋

宋柳拱辰天聖中試珠藏淵賦王拱辰榜登第至和  
知永州即有掛冠之志創一橋曰歸老曾南豐作記



山堂肆考卷二十七